


Huldeblyk aan Prof Hekkie



Hekkie Harmse was 'n geliefde eggenoot, pa, oupa asook geëerde Professor en 'n man van vele talente.

Hy was as geoloog verantwoordelik vir die kartering en ontdekking van verskeie ontginbare mineraal afsettings dwarsoor Afrika vanaf die Kaap tot in Kenia en Tanzanië. Hy het vir ongeveer ses jaar lank sy aandag entoesiasties hieraan gewy in diens van 'n groot myn konsortium. Gedurende hierdie tydperk in Afrika het hy onder andere ook die voorreg gehad om die bodem van die Kariba dam te karteer nog voordat die damwal gebou is. Hy het akkuraat voorspel dat die watermassa lokale aardbewings sou veroorsaak wanneer die dam sou vol loop.

Hekkie het graag staaltjies vertel uit sy onvergeetlike tydperk in Afrika soos toe sy blindederm gebars en 'n werker (wat beswaarlik kon bestuur) hom noodgedwonge met 'n Land Rover na 'n twyfelagtige veldhospitaal moes haas. Die tog het oor honderde myle deur die veld en oor swak paaie gestrek - 'n riller van 'n rit om die minste te sê! Dit was slegs een van verskeie lewensbedreigende situasies waaraan hy blootgestel was. Ander het ingesluit geelkoors, swartwaterkoors, malaria, leeus, buffels, olifante, seekoeie en krokodille. As gevolg van eindelose frustrasies met sy Land Rover in Afrika het Hekkie gereeld grappenderwys na Land Rovers verwys as " 'n dirty trick wat die Engelse op die kolonie kom speel het!"

Terug in Suid-Afrika het hy by die Potchefstroomse Landboukollege as navorser gaan werk en is hy ook uiteindelik na 'n twee jaar lange verlowing met sy eerstejaarsliefde, Marina Scheepers, getroud.

Na sy M.Sc. het hy oor 'n tydperk van vier jaar sy doktorsgraad in Utrecht, Nederland, met lof geslaag. Marina moes haar Matthias Klotz viool en Hekkie sy getroue dubbelloop .505 Gibbs olifant geweer verkoop om vir die studies in Nederland te help betaal.

Hy het vanaf 1973 by die destydse PU vir CHO as professor gewerk en is later tot departementshoof bevorder. Prof Hekkie het verskeie publikasies, studiestukke en boeke gepubliseer gedurende sy tyd by die PU vir CHO. Sy insprake in die lewens van sy studente het baie verder gestrek as net studies. 'n Groot aantal van sy oud-studente lewer tans noemenswaardige bydraes in die veld van Grondkunde tot groot voordeel van onder andere die boerderybedryf. Baie van hierdie oud-studente het steeds oor die jare heen gereelde kontak met hom behou.

Prof Harmse het ook beduidende bydraes gelewer in die studieveld van Terra Meganika (voertuig mobiliteit) wat die SAW se langafstand vegvermoëns aansienlik verbeter het. Hy het verder waardevolle insette gelewer in strategies gevegsbeplanning vir SAW in Angola met betrekking tot

voertuig mobiliteit en kaarte. Hy was ook lid van die Grondklassifikasie werkgroep vir die binomiese-, sowel as vir die taksonomiese sisteem en was erelid van die Grondkunde Vereniging van Suid-Afrika.

Hekkie was 'n ervare jagter en het graag iets vir die pot geskiet. Hy het sy liefde vir jag tot op gevorderde ouderdom uitgeleef en sy seuns het hom van kleins af op verskeie jag ekspedisies vergesel.

Op 55-jarige ouderdom het hy egter 'n ernstige beroerte in die veld gehad en moes om gesondheidsredes aftree. Hy het op merkwaardige wyse van die beroerte herstel danksy intensiewe terapie en sy vrou, Marina, se puik versorging. Daarna het hy nog talle groot mediese terugslae oorleef waaronder 'n aorta aneurisme, 'n pulmonale embolus asook 'n heup- en twee knie vervangings. Ten spyte van al hierdie ontberinge, het hy altyd moedig voortgegaan sonder om ooit te kla.

Drie jaar gelede is Prof Hekkie weer aangestel as Buitengewone Professor by die Grondkunde Departement en gedurende dié tydperk het hy verskeie nagraadse studente help mentor. Hy het ook in hierdie tyd sy laaste boek (in samewerking met A.M. Hattingh) met die titel "The sedimentary petrology of Western Free State and adjacent areas north of the Vaal River (South Africa)" gepubliseer.

Hekkie het op 82 gesterf omring deur sy gesin.

Hy sal onthou word vir sy fenomenale kennis van grondkunde en die natuur - in die besonder van plante en hul simbiotiese bestaan met grondtipes en fauna. Sy groot liefde vir die oop ruimtes van Afrika asook sy grondige kennis van plekke, geskiedenis en kulture, die lands-en wêreld ekonomieë, sal ons altyd bybly. Hierdie kennis het hy toegepas en graag gedeel met sy familie, studente en vriende.

Hekkie se heengaan laat 'n groot leemte as familieman, vriend, kollega en mentor.

Hy laat sy vrou Marina (wat 54 jaar lank aan sy sy was), sy seuns Barthlo en Egbert, sy dogter Almarie en vier kleindogters Marina, Alet, Jani & Nina agter.